



DEO OPTIMO MAX.

UNI ET TRINO,

VIRGINI DEI-PARÆ, ET S. LUCÆ,
Orthodoxorum Medicorum Patrono.

QUÆSTIO MEDICO-CHIRURGICA,

QUOD LIBETARIIS DISPUTATIONIBUS,
*manè discutienda in Scholis Medicorum, die Jovis vigesima-quarta
mensis Martii, Anno Domini M. DCC. XLVI.*

M. PETRO CHEVALIER, Doctore Medico, Præsidente

An senescentibus Oculi inflammationibus, conjunctivæ scarificatio?

I.



CULUS undequaque rectus, circumseptus,
munitus summi omnium bonorum largitoris be-
neficientiâ, quâ solâ non potuit contegi ut nostris
prospiceret commodis, hac unâ (anticâ scilicet)
parte patet, plurimis obnoxius infortuniis. Sep-
tem membranis ac tribus humoribus constans,
ferè sphæricam induit formam cujus diameter una à fundo ad

A

corneæ pellucidæ centrum, elongatur propter peculiarem istius corneæ pellucidæ convexitatem, altera è contrâ transversalis diameter, minuitur quia depressum manet utrumque sub musculis rectis oculis latus. In foveâ ossæ, conicâ, parte, anteriori & superiori cranii collocatâ, continetur ac movetur Oculus. Nec majorem partem ejusdem cavitatis occupat. Glandulis enim pinguedine & sex musculis nudatus oculus, nec duodecim lineis longitudo ejus par erit, nec quartam uncie partem pondus ejus superet. Si quid plus aut minus, in longitudine & pondere, eadem glandularum, pinguedinis, & musculorum habeatur ratio. Membranarum, quatuor communes, tres aliæ propriæ dicuntur. Communium extrema, adnata seu conjunctiva nuncupatur, cujus est officium oculum tum ossibus tum palpebris jungere ut in thalamo suo stabiliatur. (a) Hæc albicans, palpebras internè, & scleroticam externè, versus globum reflexa obtegit, relicto orbiculari intervallo cujus limbo, cornea translucida, sicut lapis pretiosus auro, circumducitur. Pretiosa certè cornea cujus pelluciditas summo opere tuenda! Cristallinus obscurior fiat, deprimitur: incisâ corneâ effluat foras aqueus humor, sanatâ incisione, renovatur: cornea verò, quartâ lineæ parte vix crassa, si exulceretur, vel cicatrix in ejus totâ superficiei remaneat, obtunditur & inutilis prorsus fit oculus, aliunde sanus. Nunc totus à cicatrice albicans, difformis, tristis, quantum mutatus ab illo qui nigricante pupillâ, latus, refulgens, auditus & vocis vices gerit. Quandiu viget oculus, quot indicia sumi possint ab oculorum inspectione dicat quicumque in metoposcopia non rudis? Quot amantium minister oculus, eorumdem proditor? quam utilis imò necessària Medico ad diagnosin simul & prognosin sagax oculi inspectio. In ictero, oculi flavi, incipiente febre, paululum sanguine colorati

(a) Fortun.
Plempii Ophthalmogr. Lib. III.
cap. 5.

Sin in processu cœpit crudeſcere morbus

* Virg. Georg.

Tum verò ardentes oculi *

urentis calor is malum demonstrant, futurum prænuntiant. Ut valeat, absit à conjunctivâ color omnis à nativo tantillum de gener. Nullibi sana, nisi alba. Levi tamen de causâ rubet. Frequens iste morbus est *inflammatio* quam duplici therapêiâ curare tentat Medicus, alterâ generali ut sanguinis è brachio, saphenâ, aut jugulari missione, balneo, enemate, diluentibus: alterâ particulari nempe topicis. Cum verò (ut accidit non

nunquam) ita ingravescit *inflammatio* seu *ophthalmia* ut stagnans humor ulla arte resolvi nequeat , tunc celebranda venit *scarificatio*.

I I.

SCARIFICATIO est minutissimorum vasorum ex multiplici sectione depletio. Sive igitur uno ictu , cum instrumento pluribus scalpellis armato , sive unico scalpello phlebotomo-ve crebris plagulis celebretur , nihilominus scarificationis nomen audit , hoc phlebotomiæ genus. Hæc Chirurgica , balneatoria apud germanos illa nuncupatur. Instrumenti hos in usus confecti varias pluribus in locis figuras reperire est : at quamvis aspectu primo dissimiles videantur , unum tamen & idem instrumentum exhibent. Quamvis enim lanceolarum directio alia sit perpendicularis ad cutim , alia horizontalis , & cucurbitularum alia caloris seu ignis vi , alia anthliæ seu follis aspirantis pneumatici ope sanguinem inspiret , nihil refert : eadem vasorum sectio , eadem sanguinis depletio , eadem proinde operatio , quæ in utroque casu non plus Medicinæ luminis addit quam ægrotantibus salutem. (a) Quantum valeat opportunè facta scarificatio , non solum immediate in inflammatione , sphacelo & gangrenâ affectis partibus , sed etiam mediata ad procurandam sanguinis derivationem aut revulsionem , in cephalalgia , ac præsertim in oculorum inflammatione , nullus in rebus Medicis adeo peregrinus qui non fateatur. Jamjam à multis annis cognita & cum felici successu factæ hujusce operationis usus præscriptionem inducit , nedum præscriptionem. (b) Omnibus Ægypto versantibus , variarum cutis scarificationum pro mittendo vacuandoque sanguine vice sectarum venarum usus est notissimus , præsentaneumque hocce remedium apud eos habetur in capitis cum doloribus , tum inflammationibus , atque præsertim omnibus *inflammationibus oculorum* ; quæ quidem scarificatio in inflammationibus & fluxionibus humorum ex plenitudine obortis *universalis* vel *totius* appellatur ; si verò in parte in quam humor decubuit *particularis* dicitur. Hanc particularem frequenter in usum adhibent in fluxione paululum firmatâ , in Erysipellate vel aliquâ aliâ parte inflammatâ ubi pertimescunt ne in gangrenam degeneret partis diù perseverante pertimescenda sunt mala , ea certè oculis præsertim debent eò diligentissimè præcaveri & sint quædam oculorum inflammationes in quibus tanta sit va-

(a) V. Ambr. Paré. Lib. XII. cap. V. Laur. Heist. Chirurg. Tom. I. Tab. XII. fig. 4.

(b) Prosp. Alp. L. III.

serum atonia humorisve stagnantis spissitudo, ut nequē ab internorum topicorumve remediorum vi sanguis lymphaticis incarceratus vasis resolvi queat ac resorberi.

III.

QUAMVIS tenuissima & albicans conjunctiva, innumeris tamen, secundum totam suam extensionem, donatur vasculis serosæ tantum sanguinis parti continendæ in statu naturali destinatis, & solo visu, nisi obstructione, inflammatione, aut post mortem injectione distentis atque oppletis, non aspectabilibus. Serosus iste latex suis in capillaribus vasis, eadem lege ac purpureus latex suis in majoribus, coercetur ac movetur. Indè ut duplex est vasorum ordo, duplex quoque laticis est progressio. Arteriosa una quæ per arterias lymphaticas, venosa altera quæ per venas. Suppeditantur arteriæ istæ lymphaticæ 1^o. à tribus arteriæ carotidis externæ ramulis, quorum unus arteria musculi masseteris dictus, super os jugale ascendens ad palpebras & conjunctivam vergit, alter est arteria angularis canthi majoris, in quam desinit arteria maxillaris externa. Tertiùs verò est arteriæ maxillaris internæ propago, quæ per fissuræ sphænomaxillaris portionem suborbitariam dictam progrediens, ad eandem partem advenit. Residuum autem sanguinem, excipit vena jugularis externa. Ideò procedit inflammatio, quia sanguis ex vasis sanguineis in vasa lymphatica protruditur, sive ab ipso sanguinis impetu, sive propter nimiam vasorum lymphaticorum dilatationem ex spissioris lymphæ præsentia, cujus est generis Oculi (cei quod idem est conjunctivæ) rubor, qui nihil aliud est quam nascens inflammatio, quia tunc sanguis in vasa conjunctivæ lymphatica ad incoloratum limpidumque liquorem recipiendum tantum apta intruditur. Turbatur itaque vasorum mirabilis ordo, vasa ex lymphaticis evadunt sanguinea, adnatæ tunicæ distinctus antea nunc cum iride confunditur color, quibus modo benigni & amabiles oculi

..... Nunc flammea torquent

* Virg. Æn.

Lumina. *

ardet, tumet oculus, acris & quasi sale marino impregnatus depluit glandulæ lacrymalis humor, pruritu torquentur palpebræ, nec illæsa remanebit visionis porta, corneam dico, quæ minus impune violari nequit quam internum visionis sacrarium. Texturam, crassitiem, situm, connexionem ejus sedulo inquire. Ex

vasis lymphaticis texta, tunicâ innominatâ cooperta, in parte anteriori & mediâ inter utrumque oculi canthum sita, continuo palpebrarum motu polita & expurgata, in totâ sui ipsius peripheriâ cum scleroticâ & adnatâ ita conjuncta ut adsit communicatio inter vasa conjunctivæ & corneæ. Quamdiu vigent istæ membranæ, non patet communicatio; in ophthalmiâ verò totiûs conjunctivæ, sanguis in majoribus ejus vasis coacervatus, inspissatus, à tergo semper versùs corneæ limbum pulsus, affinium corneæ vasorum oscula continuo nisu distendet, lymphatico vasculosam corneæ penetrabit substantiam, tunicam innominatam sublevabit. Hic minimis & ultimis sanguini coërcito vasis nullus nisi retrorsum exitus datur, quem finem citò assequeris sanguinis missione, balneo, si ex plerhorâ tantum originem ducat hæc inflammatio; si ex calore sanguinis, diluentibus; si verò ex sanguinis vitio, lue venereâ, scorbuticâ, curatu difficillimâ, durante causâ durabit & effectus, quodcumque feceris, oleum & operam perdes, omne topicum, inutile; felix nimium si è salubribus insalubria, è medicamentis, venena non fiant.

I V.

SANGUIS ad circulationem continuam in corpore peragendam natus, diutius intrâ vasorum parietes immotus impune coerceri nequit. A tergo semper adveniëns sanguis, magis ac magis coacervatur, & eò plus distenduntur vasa. Præterea requiescat sanguis brevi in putredinem vergens, jam ultra modum tensos internos vasorum corrodit parietes, tum sanguinis & vasorum fit corruptio, & ubicumquè sic stagnaverit sanguis deses, pars in abscessum brevi aut gangrænâ, aut denique in sphacelum abit. Cui si præcavendo, sanando-ve malo feliciter, imò necessariò adhibeatur scarificatio, quidni & oculo iisdem in casibus mederetur? Cur majori cum cautelâ adhibita, fausto minis omine celebraretur? De hæc autem operatione, sicut de cæteris Chirurgiæ operationibus, & Pharmaciæ medicamentis sentiendum esse dijudico. Ea est sortis humanæ conditio, ut ubi quid parùm usitati, quamvis non sine successu tamen ab aliis tentati, nosmetipsi aliquoties incassum experti fuerimus, vituperemus & malimus tanquam nocivum repudiare inventum quod alieno ne verat honorî nostro probro metuimus, quasi probum non esset, nolle ab aliis discere & doceri quod sine nostrorum concivium detrimento ignorare non possumus. Quotidiano usu & felici testantur Angli vesicam in collo aut in latere incidi.

impunè; à nostris, quia pluries tentata infelicitè hæc operatio, tanquam noxia ejuratur. *Ad extrahendum è vesicâ calculum diversa-ne minùs pro re natâ debet usurpari Chirurgia?* Nihil sæpè aut parùm ab Agrytis & extraneis Oculariis tentata proficit scarificatio conjunctivæ. Quid indè? Repudiabitur-ne? Circumforaneorum Oculariorum potiùs imperitiâ & pravum instrumentorum delectum incusa; noli alienum crimen in beneficam & innocuam operationem vertere. Jam in balneatorium uno ictu cum pluribus scalpellis, & chirurgicum qui fit successivè cum unico scalpello distinximus scarificandi modum. Quoties Chirurgus ex crassâ cute sanguinis quantitatem revulsioni vim habentem scarificationis beneficio educere voluerit, balneatoriâ utatur, dummodò minutissima secentur vasa & sanguis ex iis educatur; nullus inter ea delectus: quænam secentur, nihil interest longè aliter in oculo. Circa hoc versatur difficultatis cardo. Inter correpta inflammatione vasa, pro ratione propriæ suæ debilitatis, plus minùs-ve varicosa fiunt; indè efformantur majores vel minores veluti sacculi (præsertim *senescente inflammatione*) qui magis ac magis ampliores facti, capillarium cornæ vasorum ostia diducunt, inter lamellas ejus viam sibi sternunt, & eam caligant, non solam: Oculus enim aliundè sanus, nunc tanquam telâ obvelatus, frustrâ videre tentat. Quæmodò corpora, nunc umbræ; homines, nunc phantasmata; quæmodò lux, obscuritas; dies, vertitur in noctem. Hujusce generis ophtalmiæ per scarificationem curandæ causâ, quasi balneatorium, ex secalinis Aristis quibus calix ejus squamosus munitur, sibi effinxerunt instrumentum, peniculi vel scopulæ instar, dilacerandis potiùs asperitate suâ, quàm secandis variis conjunctivæ vasculis aptum. Secalinarum Aristarum loco, hordei Aristis utebatur Chirurgus quidam Anglus. (a) » Quia » verò, inquit, fragiles nimium & fractu faciles inter oculi globum & palpebras, ita ut novus indè exoriat morbus, tutius » aliud inveni scarificatorium ex tritici aristis (hordeo rigidioribus) compositum «. Aliis equisetum majus placuit, aliis ficus fossa, os sepiæ. Alii non meliùs consulti, radulam quamdam ferream excogitarunt, quibus omnibus instrumentis similiter utuntur, quam operationem vocant gallicè *broffer l'œil*. Talis operatio, talis effectus. Jam ultrâ modum tensa, & calefacta, irritatur, accenditur conjunctiva, majora minoraque ejus vasa indiscriminatim lacerantur, peccant majora, minora plecuntur.

(a) Supplement.
à Bened. Duddell.
Chirurg. Londin.

tur, & status ejus fit pejor priore. Quid ergò agendum? Est modus in rebus agendi. Periculum minantur majora tantùm quædam vasa varicosa, consilioque manuque scarificatorium dirige, neque scopulis, peniculis, radulis tanquam oculo infestissimis utere. Sufficit acus chirurgica deprimendæ cataraclæ apta ex utrâque parte exacuata. Totidem sacculi herniarrii, totidem sectiones. Ne quid nimis? Depletis majoribus vasis, citò evanescet per ramificationes, anastomosis, ex capillaribus vasis incarceratus sanguis. Qualis erit inflammatio; talis erit & scarificatio; nec plus, nec minùs. Non soli conjunctivæ, & indè corneæ, sed interno etiam oculi globo forsan salutaris erit hæc operatio, choroïdi, uveæ, retinæ per communicationem ramificationum carotidis externæ cum arteriâ opticâ, ita ut non tantùm conjunctivam & corneam immediatè ab ulcere & cicatrice, (quod solùm nobis probandum incumbit,) sed totum etiam oculi globum ab inflammatione, gangrænâ, mediatè vindicabit hæc *scarificatio Chirurgica*.

V.

U B I pars aliqua inflammatione corripitur, convenit sanguinis depletio. Sed, inquires, revulsiva tantùm, non verò derivativa. Ergò nec partis inflammatae scarificatio, quia eò major sanguinis copia in partem affectam fertur. Quis dubitat à revulsione esse ordiendum, in eâ perseverandum? Sed tandem nullus-ne erit revellendi finis? Si revulsio vim omnem eluserit malum pervicax; si mollitie pulsûs, eucrasia totius reliqui corporis, functionum cæterarum omnium integritate constet nullam esse plethoram in toto corporis habitu præter vitium loci, quid derivationem reformidabis? Revulsionem primò necessariam asserimus, nedùm illi repugnemus. At incalsùm celebratâ revulsione, tunc tutò ac secure, tunc necessariò ad derivationem tanquam ad sacram anchoram nec immeritò confugimus. Ea sola salus, eò securior, quòd revulsione præviâ, depleta satis nullum derivationi immediate ex parte affectâ faciendæ periculi metum relinquunt. Instas, si non nociva hæc scarificatio, saltem inutilis, quia nullus ferè sanguis ex vasis exiguisimis elicitur. Quid, si iste nullus ferè sanguis, solus noceat, solus foveat inflammationem? Quid optas ampliùs? At effectus & expertissimorum virorum testimonia alienam esse à vero hanc objectionem pro-

nunciant, quia certum est scarificationis ut & venæ sectionis beneficio æquè crassum sanguinem & eandem quantitatem detrahi. Tange nonnihil membranam, inquit, dolorem excitas (a), à fortiori quid mali non advehet conjunctivæ scarificatio? In eo præstat nostra scarificatio, quia nulla laceratio, nulla inutilis incisio. Ergò dicis, non scarificatio, sed punctura? Puncturam apage. Nescis structuram corneæ tendineam, nerveam, membranofam reformidare puncturam quamcumque. Punctus tendo, solâ incisione curatur. Fiat igitur incisio, quæ pluries repetita variis in conjunctivæ locis, ubi opus est, strangulatas ubique partes laxet, captivum ac desidem sanguinem liberet. Quod si eodem quo monuimus modo, iis oculi inflammationibus, quæ nullâ prius arte curari potuere, celebrata hæc scarificatio profperum habeat exitum, necessariò concludendum venit,

Ergò senescentibus Oculi inflammationibus, conjunctivæ scarificatio,

DOMINI DOCTORES DISPUTATURI.

M. Claudius Person.

*M. Joannes-Stephanus Guettard,
è Regiâ scientiarum Acade-
miâ, & Censor Regius.*

*M. Joannes Bessé, Dotarie His-
paniarum Regine, dum vi-
veret, Medicus Primarius,
M. Antonius de Jussieu, Regi
à secretis, Regiæ scientiarum
Academie, Regiarumque So-
cietatum Angliæ & Prussiæ
Socius, Botanices in Horto
Regio Parisiensi Professor ac
Demonstrator.*

M. Carolus-Ludovicus Liger.

M. Franciscus-David Hérissant.

*M. Joannes-Baptista-Thomas
Martineq, Chirurgiæ Gallicæ
Idiomate Professor designatus.*

Proponebat Parisiis STEPHANUS POURFOUR-DU-PETIT,
Parisiensis, in Supremo Senatu Parisiensi Patronus, Saluberri-
mæ Facultatis Medicinæ Parisiensis Baccalaureus, A. R. S. H.
1746, à sextâ ad meridiem.